







粵自書契作而後有文章三代其郁郁乎秦漢  
 尚矣魏晉續紛至唐文雖三變終不逮古  
 而下誠無譏焉我明興以來風化漸被人文  
 日盛傳至孝宗朝有若北地空同李公中州  
 大復何公後渠崔公閩少谷鄭公關西少華許  
 公西玄馬公毫西原薛公咸擅名家力追古作  
 吾郡則有南峰楊公南濠都公枝山祝公廸功  
 徐公東橋顧公六如唐公林屋蔡公較之他方  
 作者尤多猗歟盛矣若近時之雅宜王子吾弟  
 永之居同里開互相砥礪極力研討亦已成家





方之前修足稱殆庶雅宜僅四十不祿臨化時  
夢兩蝶入袖同莊叟之符迄今爲士林惜吾弟  
十歲能文弱冠即發解連舉進士第可謂遇矣  
然素性亢直苦爲媚嫉見擠瀕死骯髒者十餘  
年既而以薦起爲職方稍遷提學僉事又以災  
州荒遠思親致疾遂乞休寧舍肆志著述更築  
別業於橫塘開圃鑿池種秫樹桑將爲終焉之  
計時余亦棄官歸永之每遇良辰佳節輒邀昆  
季友朋流連觴咏以遂初服歡燕未幾迺歲丁  
未夏日遽以疾七日而卒僅年四十有六余慟

絕者數四嗚呼惜哉嗚呼痛哉所著有文集二  
十卷先一年吾弟夢得穢疾先伯考方齋公語  
之曰子病將就木也弟乞緩死以集梓未畢故  
而伯考弗許至是果如其兆抑亦竒矣豈運命  
所限其數已先示乎吾姪尊尼痛父志之未畢  
築築哀疚卒後三月鳩工刻就茲集將以傳之  
四方請余序首簡余不學何足以言文尼以余  
哭之悲而思之殷也乞之逾懇嗚呼詎忍言耶  
詎忍不言耶因拭淚書此以慰之云爾是歲九  
月之望兄表書



家弟永之文集序

嗟乎余忍序吾弟文耶歲壬寅永之自南兵部  
真外郎轉廣西督學僉事明年癸卯春仲寄余  
書曰弟必死於桂林矣所著詩文已成集凡若  
千卷兄知弟爲弟序而梓之是年余北上五月  
舟發猶子尼來別余曰汝父之集汝謹護之汝  
父必歸矣序言未暇也及抵京口果值永之乃  
真棄官歸相見命觴歡笑談桂中山水及游匡  
廬九華諸山之勝蓬底紫蘭荊花盆盎香郁怡  
然半日各賦詩別去及余北歸永之蕭然間居



所築橫塘之黃山草堂閉門讀書課農蒔圃每  
花穠月霽命觴聚昆季然足跡不入城府始永  
之年七齡即喜歌吟十五應舉弱冠攻時業才  
名騰沸及發解南都鄉譽帖服繼登甲科入翰  
林改刑兵二部郎署校文中州以失火謫戍湖  
南永之自入官結交海內名勝由是詩文日益  
加進名聲奕奕在公卿間然性孤亢與人寡合  
頗爲不相知者所嫉今年四十有六暴疾而卒  
孰期其竟死耶孰期其止於是耶悲哉夫古之  
文士不享其年者亦多矣今若信陽何景明大

梁高叔嗣沁水常倫同邑若王寵皆以才華露  
發皆不享其年所恃以不朽者乃曰有言語在  
碑版斯言也不亦大可痛乎永之詩擬高岑文  
喜學先秦西漢當其快意處則沉著懇到體裁  
踈秀琅琅可誦今觀集中若世緯數篇實有用  
世之志究其學亦欲得國而治之而今已矣集  
梓已成因按淚序之以踐昔歲桂林之言嘉靖  
丁未秋九月降霜日燈下仲兄裝撰



詩文集二十卷先公手自選校就梓者十之六而公棄世不肖尊尼乃續完之工訖於丁未八月距公之歿蓋三閱月云始公之將梓集也年方強艾或規其太早公慨然曰夫修短者稟命之期也榮名者立身之槩也有生必有死吾何諱焉古之稱不朽者有三豈以年哉且河清難覩駒隙易馳以蜉蝣之身寄於天壤之間非有茂德碩功乘時邁會照耀紀策者不假竹素之業何以自見乎昔丁敬禮謂後世誰相知定吾文者陳思賞誦以爲名言悠悠我心懼來者之



不可俟耳嗚呼公可謂達識遠覽矣時公業已  
夢得穢疾趨井井上遇故伯祖方齋公謂日子  
病殆死矣公跽請得覩梓集成死且無憾再三  
請不許驚寤嘆曰北矣命也柰何乃命促刻集  
竟未及成而妖夢是踐疇曩之談若出冥會悲  
夫悲夫惟我先公挺嶽降之靈粹星精之秀強  
記神解得之性成加以博綜勤覽蒐羅靡懈百  
家群言無不通總弱冠登第即選入翰林讀秘  
閣書肆力古作期以文章名世時海內宗匠如  
金陵顧公信陽孟公濟南邊公關西許公綬德

馬公祥符高公同郡文公峙列中朝咸折行降  
交聲倡響和由是譽口藉起同進之彥皆推服  
之未幾奉 詔校文河洛以書謁北地李公公  
一見傾蓋討論藝術窮數日夜投贈相逢行一  
篇惜相知之晚乃後業日益進每有撰製閉戶  
展牘寢息並廢精思玄構操筆累數百言浩然  
如决峽注海不爲棘詭摹剗之辭取材命式希  
復元古自魏晉而下弗以加意常慨我 明創  
締之盛跨絕往代而典制未彰久遠無考乃作  
鏡歌十三篇四言詩八篇七稱一首懲胡論二



篇以摘掇 昭代之休烈自謂無讓於古人也  
文多載集中歷宦二十餘年資僅一考骯髒勢  
路惟以著述自娛方將彙群經之緒義綴列史  
之遺業殫其心力勒成一家導文瀾以騰轡振  
大雅於末造洪規未究而大運已徂故所撰  
皇明獻實吳中先賢傳諸書多未脫稿悲夫悲  
夫豈天之無意於斯文也胡奪公之遽耶尼也  
顛昧何足以知斯文之興喪顧手澤尚新而泰  
山莫仰耳言猶在而九京不作軫徽音而長慟  
撫遺編而盡心惟先志之弗承是懼是用發其

家藏傳之都邑必有知子雲於當時推孔融於  
異代者矣不肖孤尊尼泣血謹識



袁永之集卷之一

四言

郊丘篇

方社篇

朝日篇

夕月篇

大禘篇

耕籍篇

省穫篇

躬桑篇



昊天降威

有肫其星

皇矣

雞鳴

吉日

載馳

晨風

穆穆良辰

熙熙暮春

袁永之集卷之一

郊丘篇

明明上帝肇禋于郊我 后饗之率彼百僚○於穆

圓丘我 后肇之粵稽禮文 祖訓詔之○崇崇者

壇則天垂象隆隆土階南離是嚮○臯門既辟周垣

于衛以福以庖帝牛于繫○我 后来饗維冬至日

我袞我旒玄圭翼翼○有秩陽位越席斯陳秉我玉

璜曰維 一人○有虔百僚夙夜奔走直哉維清以

左以右○皇皇田燭三星在南樂既萬舞升臭于天

○朝陽彤彤卿雲粲只燁彼露斯緒風先去聲只○承





天之休降福穰穰撫于五辰誕惠我多方

郊丘十章章四句

方社篇

有嚴方丘于郊之北我享我將于夏至日象維  
坤儀隅位斯秩○定之方中肇茲土功馮馮版  
榦蒞于司空式禮弗愆曰維秩宗○既卜既戒  
告于 祖禰龍旂和幹 天子至止桓桓虎賁  
于牧于野○赫赫地祇陟降在茲配以 皇祖  
于壇之隅靈來洋洋百神前驅○曰既三爵曰  
既九奏薦以黃琮曰維我 后以瘞以埋于壇

之右○雍歌告終 皇邁其行順動以豫 皇

心載寧綏我萬方地天平成

方社六章章六句

朝日篇

路車龐龐于彼東郊維茲仲春迎日以朝○有  
來王宮宵中燕息壇官蹒蹒候彼出日○嗶嗶  
鼓鍾晨雞既鳴庭燎寢矣東有啓明○日之方  
升出自暘谷燭龍疾馳耀彼若木○赫赫明明  
照臨下方太陽麗天羣陰伏藏○皇欽若昊天  
寅賓有禮朝日有壇自今歲始○自今歲始豐



年屢康時雨而雨時暘而暘

朝日七章章四句

夕月篇

維夜明有壇西郊之外來享來臨幽宗于配時  
維秋分其日癸未○皇服小采鎮圭以趨羣弁  
如星戾止壇隅司儀布位祝史贊辭○乃薦罇  
壘醴齊清酏肆以豆籩載之牲俎六變孔諧雲  
門斯舞○邸璧既奠實柴斯升燎之燔之格于  
陰精齊政授時糾虔天刑○維茲夕月禮視朝  
日于社于郊神祇來格於皇樂斯創茲典式

○皇之制作協于陰陽與唐虞參于列祖有  
光施我孫子敬守典常

夕月六章章六句

大禘篇

於皇顯孝肇修禘祀邇追烈祖綏我駿惠  
奏假厥初陟降有位○嗟嗟烈祖受命宅土  
疆克開厥家德懿發其祥遐矣思成肇基古  
先王○衍我初祖獻享有秩虎彝山尊全烝  
繭栗升歌管象庸鼓有斲○靈之格思蕙蒿在  
天丕顯丕承對越周旋降福孔多維湯孫是荷



大禘四章章六句

耕籍篇

孟春元日公田于邁司空除壇集是保介甸師  
封人灑掃祗戒○蒼輅耕根遵彼廣塗以耒以  
耜載于前驅籍彼千畝南郊之隅○土脉既發  
習習協風玄冕朱紘 皇來齋宮灌鬯羞醴祀  
我先農○錢鎛既陳有種有稷 皇于三推乃  
播嘉穀貴賤以班羣耦來續○饁彼田畯終畝  
其勤是薦是藜載柞載耘黍稷茂止以共粢盛  
○我公我私祁祁甘雨於惟豐年以洽百禮敬

授我民時以詔孫子

耕籍六章章六句

省穫篇

於樂靈囿 皇宮西所湜其流泉漑我膏土奄  
人于田有稌有黍○皇來雍雍匪觀匪游于以  
省歛歲其有秋相彼原隰滯穗莫收○此曰築  
塲彼曰登圃禾既偃畝莫之敢取銍艾維時實  
我廩庾○維此靈囿有沼有臺爾服爾耕莫敢  
污萊○皇曰無逸稼穡維艱彼昏慢游于佚于  
盤



省獲五章三章章六句二章章四句

躬桑篇

出自北門降于公桑龍旂九旂鸞和央央○皇  
后蒞止從以世婦爛其如雲緩蹕清路○川原  
膺膺有館有壇戒之戒之以祀先蠶○懿筐曲  
植旣勅旣具浴種于川率是嬪御○有鳴倉庚  
采采遠揚言還言歸傾筐是將○以繭以縲三  
宮是卜冕服旣成玄黃朱綠○維后親蠶維

皇躬耕勸相小民王業底于成

躬桑七章章四句

昊天降威

紀雷變也

昊天降威曷用其訕大戾薦臻適丁我躬六月  
炎暑胡茲飄風曠曠其陰淫雨蒙蒙○維此淫  
雨崇朝爲虐塗潦盈庭高陵爲壑憂心如焚憊  
憊靡樂小民怨咨孽自天作○電旣燁燁荐雷  
不寧以擊以摧震于宮庭瞻彼象闕毀其丹楹  
臯門有伉垣墉以傾○王宮震矣棟撓折矣出  
自城闈夫屢覆矣氓之無良嗟乳獨矣震于其  
躬罹荼毒矣○荐雷虺虺逞茲淫威天鑿孔邇



降于郊畿 皇曰可畏朕躬有違肯災以類敬  
天之渝○明明紀綱 皇實敬忌誰秉國鈞召  
此顯異賦政愈感民用殄瘁我心憂傷曷知其  
勤○嗟彼孔壬喻訛懣傲職蔽左右讒口囂囂  
卿士大夫及爾同僚噂沓詭隨莫知我勞○喪  
亂之生回適其故小民何辜逢此俾怒 皇之  
忠思無愆于度敷求哲王匪用憂懼

昊天降威八章章八句

有皖其星

紀彗星之祥也

有皖其星東方自出爛其芒炎指于營室自東  
徂西嘒嘒終夕○粲彼宵燭柄揭于南彗之見  
矣具曰凶占于以除穢先民有言○皇惕其衷  
不遑安處天之方濟莫敢戲豫訓于百工交修  
儆懼○咨爾秩宗邦典攸貞政之僭差爾釐爾  
繩蹶蹶保章夙夜靡寧○凡此疾威下土之孽  
六月而見仲秋乃滅敬哉庶徵亂是用懲

有皖其星五章章六句

皇矣

送少宗伯分宜嚴公視禮 顯陵也



皇矣 獻考獻哲維則宅茲郢方以蕃王國篤  
生我 后膺符受曆奕世丕承率土是式○滔  
滔江漢翼軫之墟我 后龍翔奄有中區誕基  
駿命光纘鴻圖赫赫在天肇闡徽謨○帝念孝  
思繼序無忘位號斯崇惇我天常有翼清廟祀  
禴烝嘗是彛是訓申誥多方○乃命司空伐石  
京師述矣山陵楸建厥規以經以營爾卜爾釐  
窮極制度備物多儀○秉笏荷戈翁仲祁父其  
獸維何有虓有虎詭狀殊形訐訐嘖嘖浮濟涉  
湘達于荆土○帝勒碑文經緯七曜貞觀丘封

篤我純孝億萬斯年湯孫是詔冢人司禁衛其  
隧道○帝曰秩宗掌建邦禮爾遄其行敬纘其  
事司分吉蠲太常攸蒞相以九賓毋敢失墜○  
公拜稽首受命于征四牡捷捷夙夜靡寧虔共  
祀典告奠 皇靈我弁朱裳祗謁園陵○乃薦  
廣牲乃宿金縣觀其會通象以几筵肩膺臠飴  
升遐于天假哉 皇考陟降周旋○綏予 一  
人以介福祉公曰遄歸言念桑梓式墓燔黃光  
揚祖禰亟其來朝以佐 天子

皇矣十章章八句



雞鳴

送李子仁父宰分宜也

雞鳴旦旦明星有爛子之徂矣使我永嘆○將子何徂維王事馳驅豈無他人爾獨勤劬○道之伊阻曷云能辭既曰仕矣遑恤其私○綏綏者狐逐逐者鹿心之憂矣不謂我穀○我則弗穀憂如之何人各有思遑恤其他○維王事孔棘維友朋弗覲爾實我年載笑載色子之徂矣使我心怒○凡民有言維賈知價爾實予諒如食知飡○爾之弗諒我憂則那中心慄慄譬彼

食荼子之徂矣念我實多○敬爾威儀慰我飢渴豈曰遠而將子來括

雞鳴九章七章章四句二章章六句

吉日

送大司寇崑山周公赴畱都也

肅承 王命吉日于征赫赫司寇奠邦之刑於惟周公邦之老成簡孚五辭五辭明清○維王建官尊維司寇斟酌元氣是曰北斗招搖執法 王之左右衮裳葱珩禮秩斯楙○王曰建業洪緒攸基五刑五罰爾其聽之胥占辜功式



下上之刑期無刑咎繇是師○公拜稽首敬命  
不易獄貨之繁曰罔敬忌坐之嘉石棘木是議  
制民于衷毋敢實墜

吉日四章章八句

載馳

送陳子齡也

歲之徂矣言邁靡遑僕車載馳于彼朔方山川  
伊阻道路且長將子何徂觀國之光○皇皇京  
邑天闕龍翔多士如雲珮玉趨蹌述職歛材萃  
止明堂亦既事舉亦既言揚○維 帝允文制

作陰陽倬彼絲綸雲漢爲章雍雍者儒利用賓  
王古訓是程徽猷以康

載馳三章章八句

晨風

送陸子傳也

肅肅晨風集于北林之子遠行實勞我心○翩  
翩者雉文章有粲弋人獲之三品是薦○將子  
奮飛于漸之遠載翺載翔爲羽爲儀○彼其之  
子賓于王所此之弗減于戍之苦○人亦有言  
九軌殊岐慎我幅員毋謂遠而○勉勉夙夜載



爾令德譽命有聞保爾終吉

晨風六章章四句

穆穆良辰

壽方山人質父也宴于清溪堂云蓋集者八人吳之彥也文太史曰詩有之爲此春酒以介眉壽人各賦一詩以爲山人壽而表也得介字

穆穆良辰仲春伊屆薄言東郊雲門于邁茂林紛披清渠縈帶樂只嘉賓頰弁斯會肅肅禮容有攢有介旨酒無荒終日百拜君子壽考俾爾

耆艾

穆穆良辰一章章十四句

熙熙暮春

脩禊石湖也

熙熙暮春日維上巳穀雨伊臨乃脩禊事良朋孔偕從以童稚石湖之陰以遨以戲清川洋洋惠風時至流觴合歡稱詩言志樂矣斯丘古人可企

熙熙暮春一章章十四句



袁永之集卷之一

袁永之集卷之一

袁永之集卷之二

樂府

皇明鏡歌十三篇

奮塗山

江之險

都金陵

戰番陽

平淮徐

克吳會

中原清

袁永之集卷之二



島夷服

掃八閩

荒五嶺

驅殘胡

俘蜀寇

滇池竭

索永之集卷之二

皇明鏡歌十三篇

有序

或曰鏡歌戎樂也亦曰鼓吹曲云其始出漢武帝立樂府采詩之官夸耀功德聳動蠻夷軍興則雜短簫而歌之故亦曰短簫鏡歌漢曲凡二十二篇存者十八篇而辭義不屬多不可解如朱鷺翁離蓋有其辭無其義魏有繆襲吳有韋昭晉有傅玄乃悉取其題而更之其義主於褒讚鋪張蓋



亦雅頌之流亞也唐柳宗元準漢曲  
爲唐鏡歌十三篇義襲晉魏頗足觀  
采我 高皇帝龍飛塗山虎變金陵  
神州赤縣污穢腥羶者蓋三百年而  
始廓清底定七曜重明九疇復叙魏  
魏乎駿功休烈上配羲黃下陋湯武  
較之漢唐譬猶嵩嶽蟻丘江河潢潦  
懸絕殊甚而鏡歌不作樂章無傳使  
盛德大業鬱而弗宣臣嘗耻之今  
皇上坐明堂開石渠考禮文易服制

修憲章壹軌量罔不咸正而茲事獨  
闕臣不佞輒援筆爲之庶以修一王  
之制作示億萬年之典則雖不敢躋  
之雅頌列於漢魏亦足企及云

奮塗山

肇 王業也

奮塗山基側微 聖受命六龍飛提尺劍起布  
衣夷腥聞民罔依 皇耀德赫靈威赤符應白  
旄麾武不殺神知幾掃欂櫨殄封豨創王畧式  
九圍泯泯虎臣咸來歸



江之險

始渡江取太平諸路也

江之險險莫測跨荆吳限南北神龍渡江自采石糾六師集羣策威颺馳義電激雷鼓振雲旌翼吐英謀抗武德攻必摧戰乃克姑孰收土疆斥江水滔滔奄有南國

都金陵

定鼎也

都金陵布皇綱握乾樞奠坤防卜年億萬永無疆包峻嶽蔽大江鍾山岩堯王氣鬱蒼有臺

高高棲鳳凰建密室開明堂祖社列觀闕翔辟雍闢武衛張宣政令頒條章考制度朝五方

戰番陽

梟偽漢也

戰番陽湖水赤天晦冥波蕩瀟舟縱橫陣絡繹僵屍流國殤泣衆寡分勢不敵皇赫怒決神策驅貔貅剪鯨鯢揮蛇矛控鳴鏑選大黃殪凶逆貫睛裂腦師辟易厥角崩倒戈北江漢清鄢郢謐威八蠻震九域拓地開疆大統集

平淮徐



定江北也

平淮徐濠泗寧師桓桓征不庭厲長轂飛重英  
江之北無堅城汝潁底定青濟兼并芟羣雄息  
沸爭玉帛會壺漿迎廓基緒揚威靈

克吳會

滅張士誠也

克吳會疆海隅蠢茲凶頑盜越與吳業魚鹽阻  
江湖富且強奄稱孤政慢荒民毒痛兵不戢干  
天誅師百萬臨姑蘇發舩艦鑿具區糗糧絕士  
爲俘城隍覆宮社屠殲元惡釋無辜弛刑禁蠲

煩苛計田賦實師徒轉漕粟輸京都荆蠻旣懲  
偃息兵戈

中原清

遂定河洛秦晉暨燕趙也

中原清和 帝業宋室頽人網絕噫胡元恣毒  
螫驅犬羊據巢穴三光昏四維裂民怨咨日流  
血 皇應運宣武烈延英竒統材傑命上宰除  
殘孽妖氛息天狼滅宅土中九有截

島夷服

方國珍降也



島夷服息鴟張寇反覆圖不祥負海徼竄南荒  
逆王命亂天常出偏師奮鷹揚仗大順侵彼  
疆百旅集千夫翔破竹之勢孰可當智計窮乃  
來降

掃八閩

取陳有定也

掃八閩鎮南粵正辭命齊九伐鍛戈矛授斧鉞  
連飛艦整巨筏冒洪濤涉溟渤梟逆徒在奄忽  
神武章文教訖西漸流沙東至日出

荒五嶺

廣東西諸郡咸來附也

荒五嶺抵南交撫黔氓擾夷獠狙獍和瘴癘消  
越裳來重譯遙明珠翡翠貢天朝文犀瑋瑁海  
賈可招幅員萬里仰唐堯

驅殘胡

元君奔漠北也

驅殘胡虜宵奔戎有良翰集虎賁高牙雄戟布  
星屯蹂河朔擣燕雲涉大漠踰崑崙王庭空穹  
廬焚伏狐窟鼠勦滅無復存築京觀銘功勲奏  
凱歌賞三軍田燉煌開玉門億萬年華夷分



俘蜀寇

執明昇也

俘蜀寇競武功天設險維蠶叢劔閣截薛仰關  
難攻瞿塘百折盤蛟龍水陸阻隘舟車不通明  
氏竊命據高墉虎視隴右窺秦中 皇按劍授  
元戎殲大憝縛狡童天下混一囊彤弓五等光  
建九軌來同

滇池竭

梁王殲也

滇池竭南詔寧最遺孽敢不庭抗文告戕禁臣

速天誅馳勁兵蹋烏撒填昆明刺瓦殲達里禽  
點蒼裂洱水清金齒震靄翠平壘百蠻仰 皇  
靈包海外入廣輪掩羸疆恢夏經芒芒禹跡疇  
與京



袁永之集卷之二

袁永之集卷之三

樂府

大雅吟

對酒

精列

鰕鮒篇

豫章錄

短歌行

長歌行

燕歌行二首



前緩聲歌

薤露歌

升天行

飛龍篇

客從何方來二首

空城雀

塘上行

秋胡行

明妃引

銅雀臺

行行游且獵篇

相逢狹路間

結客少年場行

俠客篇

紫驪馬

鬪雞篇

從軍行

關山月

塞下曲

出關



入關

隴頭水

戰狼山

苦寒行

江南樂四首

採桑曲

折楊柳二首

自君之出矣二首

夜夜曲二首

長干曲

袁永之集卷之三

大雅吟

於穆

高祖天授神武謀臣雲從猛士如雨迅

掃欃槍

不階尺土道冠百王功高千古解一文皇

嗣服世德

同符卜年億萬肇基幽都威讙蠻荒

澤流寰區

長馭不構攘除羣胡王畧式固峻我

疆隅解二

皇皇九葉績戎駿業文命孔純九有有

截維解三

帝繹思溫恭聖哲赫赫中興無兢維烈

對酒



對酒當歌生逢聖明車書混壹天下康寧既庶  
且富黌校藹藹絃歌聲九夷八蠻通道來庭四  
門穆穆無凶人外戶不閉班白不負戴擊壤歌  
太平桑麻被野六畜蕃孳倉箱豐盈獄岸刑措  
民用情老死不見甲與兵天降甘露地出醴泉  
四靈畢至黃河清我 皇垂衣拱手無爲而成

精列

命乃在天有生必有死何爲局促自憂煎人壽  
止百年中間憂虞悔吝相糾纏人生苦不足願  
得螭龍服驂飛廉整轡游戲崑崙直與黃姑玉  
女相流連出門望郭北荒塚纍纍狐兔穴其顛  
周孔聖且賢尚且徂落無爲迂誕學神仙嗟今  
之人如虱處禪中規行矩步跼天躋地及時不  
爲樂朝坐華堂暮歸黃泉嗟嗟命乃在天且用  
蕩滌志意日飲旨酒烹肥擊鮮

鰕鮒篇

神龍失淵不如鰕鮒鴻鵠鍛翮不如鴟鷂瑾瑜  
不售不如珉礫黼黻不御不如襜褕聖哲有時  
不如下愚解一展禽三黜不薄士師尼父棲棲見  
笑接輿周公居攝四國有辭顏淵掇塵跡涉嫌



疑毀譽之來孰知是非二解豫章多材斧斤所趨  
制行太潔流俗所嗤木以樗壽士以智危天道  
無親去高增卑君子約已稱物平施三解

豫章行

虎欲食人不能出中林鴟鴞東徒尚然懷好音  
吁嗟機械之巧無如人心一解渭水雖清灌溉之  
利不如濁涇狐裘冬溫徂暑不如絺綌輕君  
子在下位雖有蘊蓄不能施行二解飛兔駉耳躑  
躅吳坂幸遇伯樂長鳴盧狗騰捷不遇韓國孰  
知其能甯戚飯牛車下不遇齊桓焉能顯名三解

短歌行

有客有客吹笙鼓瑟人壽幾何長不滿百一解歲  
聿其除時不再來譬彼薜華朝榮夕衰二解憂虞  
苦多歡樂苦鮮死生契闊誰則能免三解具我旨  
酒進我嘉穀且用言笑於爾逍遙四解日之方升  
照臨下土及我少壯式歌且舞五解先民有言惟  
樂忘憂居易俟命夫何怨尤六解

長歌行

陵苕附樛木秋至先焜黃人生如朝露壽命苦  
不長日月不我假焉用徒憂傷少壯能幾何及



特爲樂康遠遊恣所適輕舉凌八極我聞崑崙  
丘異人所棲息願得溘埃風白日生羽翼授我  
服食方告我延年術

燕歌行二首

銅壺沉沉夜何其短衾獨宿怨孤帷鬱陶思君  
君不知欲見無由覩光儀起視星宿爛參差鴻  
雁哀鳴聲正悲物情慕侶尚如茲君獨契闊無  
還期身無羽翼難奮飛道路縣邈逝何之客游  
雖樂不如歸殊方異域恐未宜憂心默默將告  
誰淚如流泉不自持人生壽命幾何時嘆恨無

如生別離

孟冬凜冽北風涼草木變衰雁南翔川原蕭條  
使人傷飢烏叫嘯號枯桑洪河水堅阻修梁念  
君迢迢投朔方三年無書寄故鄉欲往從之道  
路長含酸積憤結中腸自君之出罷絲簧室中  
蘭鐙夜無光豈無膏沐爲誰妝鴛鴦噉噉戲兩  
廂乘居匹處自成行我獨乖隔不成雙終宵泣  
涕濕衣裳

前緩聲歌

置酒會衆賓列坐進壘觴中厨促豐膳妙舞曳



織裳服飾窮綺麗翡翠雙翹揚長袖隨風飄言  
笑吐芬芳清歌發皓齒節奏中宮商音容惠且  
和變態巧低昂觀者盡稱善四座咸若狂選部  
並呈技雜還爲樂方優伶紛然進珠黛羅兩行  
獻酬互交錯堂下沸絲簧樞馬各嘶鳴安坐夜  
未央生平惟此樂緩歌安能詳

薤露歌

薤上露易晞人死無時歸有志不得騁何用生  
存爲高墳鬱嶢嶢荒草使人悲賢愚同一盡  
氣竟何之所以明哲士委順不復疑處世忌太

潔衆口易瑕疵和光而同塵老氏有遺規

升天行

珥節叩帝闈雲霓屬先驅闔闔晝不閉桂樹羅  
天樞元君啓玉齒授我以靈符秘文奧難讀字  
與科斗殊長跪問要訣妙道匪言說還精以補  
腦顏色長美好髮白更變黑延年永不老幽通  
邈上玄無爲惟自然凝神游邃始羽化彌閉涓

飛龍篇

輕舉騰玄雲遠遊乘清氣望舒使奔屬羲和爲  
我御飛龍駭超驤馳騁恣心意濯髮咸池津駕



言謁天帝玉女歡相迎羽旄紛紛至捷步登文昌長揖朝法陞太微表中央雙闕秩方位白榆夾道生羣仙共遊戲素霓爲衣裳瓊瑤爲環珮靈芝粲五色食之千萬歲

客從何方來二首

客從何方來云自京師至手持一書札上寫平安字開緘讀未畢已知故人意初述思慕情中愬壹鬱志京師今何如萬事與前異問客客不知書中亦未備道遠無由悉焉知非與是但願勿相忘書札時時寄

客從何方來去歲發京師茲行已永久來歸仲春時上堂拜父母父母歡相持親交聞客至咸來叙別離去鄉三十載無日不懷思語音雖無改顏面與昔殊昔如芳春花今如濁水泥人非金石固老醜焉可辭但願保貞素白首以爲期

空城雀

啾啾空城雀日宴不遑棲塲無穀粟腹中苦飢心復畏彈射有翼不能飛性命難保託身何危相彼丘隅樹木茂多欲往從之道遠柰何乃心焉敢望青鳥道遙安食玉山禾庶免鷹鷂搏逐



脫離網羅

塘上行

蒲生水中央託根難久長君情我所知不意遽  
 相忘解一讒言寔可畏骨肉亦參商結髮同歡愛  
 信誓謂可常解二中道忽改路獲罪自有故君心  
 如霧暄迷惑永不悟解三苦相身為女寵倖相嫉  
 妬行止不自由棄置不復顧解四故交雖難忘無  
 如新相知敝履雖難棄不如新履綦解五君心諒  
 不移棄我如泥滓淑慎無愆瑕雖辱不為耻解六

秋胡行

佳人一何姝採桑岐路隅羅袖出皓腕輕縠曳  
 文襦冶容極妍麗觀者盡躊躇解一使君何方來  
 騎從導前驅下車傾橐金巧笑致區區解二長跪  
 陳禮防賤妾自有夫未知國卿貴但知事舅姑  
解三驅車返家門奉金為母壽呼婦來中堂相見  
 顏何厚解四與君別五載邂逅如路人顏面不相  
 識寧知心所親解五君心懷二三醜行妾所耻愧  
 彼多露言捐軀濁河水解六

明妃引

少小稟貞淑說禮且明詩託身克後宮豔色世



所希按圖以召幸傾貲賂盡師無媒難自通竊  
矜妖冶姿詔下選掖庭和親嫁單于妾當事遐  
征永與君王辭光輝動左右被服何逶迤僕御  
咸嘆息胡馬亦傷悲前旌指沙漠去去無還期  
壹鬱何由愬哀感不自持胡服衣我身穹廬爲  
我居食我以羔酪號我爲闕氏語言多難曉嗜  
欲苦不齊腥羶耻穢辱醜類相詬欺犬羊蔑禮  
義苟生亦何爲生爲異域人死復葬蠻夷飲恨  
黃泉下青塚何累累君恩諒不薄妾命宜若茲  
自古畏蒙蔽蒙蔽易妍媸蛾眉衆所嫉達者無

復疑

銅雀臺

高高銅雀臺下對西陵樹淒風飄總帷潛寐永  
不寤歌伎徒自陳歡娛已非故千秋萬歲後精  
靈倘來聚

行行游且獵篇

大閱講蒐狩吉日簡車徒元戎啓先路左右備  
三驅戈鋌蔽日月萬騎紛然趨射夫咸袒裼列  
校集野虞舉烽遂伐鼓搏獸相歡娛繳矢無虛  
發殺獲在涇臯觸鋒殪青兕掩咎蹶玄狐飛走



不及施枕藉於中衢舉芋計多寡割鮮進庖厨  
悠悠旆旌返鏡吹喧道途感彼車攻篇哲后以  
爲模

相逢狹路間

相逢狹路間方軌難並馳雕輪夾輕駟繡第盤  
文螭雙雙美少年見之遂忘疲編貝呈皓齒燕  
婉巧言辭停轡問君家君家誠易知甲第冠戚  
里掖庭讓門楣金壁銜列錢錯落綴火齊堂上  
羅妾媵堂下列笙竽擊鍾會鼎食僭侈擬皇居  
兄弟四五人大者選昭儀次者爲姪娥小者克

婕妤兄爲大長秋弟則羽林兒尚方屢召見賞  
賜常不貲階前植寶樹樹樹珊瑚枝自言沐優  
渥終歲荷恩私金張與許史難可與等夷

結客少年場行

十五好騎射武斷鄉曲中任俠頗有名氣勢凌  
王公吳刀耀霜雪馬蹄速飛龍腰垂雙鞬帶手  
挽六石弓晨馳南山獵一發中五縱傾貲集亡  
命破產以相容殺人都市傍避讐客遼東妻孥  
不得顧壯士樂遠從去鄉今幾載書札無由通  
白首始還家萬事俱不同墳墓委蒿萊杼軸半



已空賓徒各分散  
藜藿長不充  
寄語結客者  
所貴期始終

俠客篇

俠客何翩翩  
生長在幽燕  
丹朱錯華轂  
羽蓋翔文軒  
鼓刀屠沽肆  
出入三輔間  
僕御塞途路  
食客常數千  
橫行盡豪舉  
四座皆少年  
報讐挾匕首  
殺吏探珠丸  
睚眦無宿怨  
一飯必周旋  
平生所交結  
心慕劇孟賢  
刎頸無怨尤  
性命寧自全

紫驪馬

蹀躞紫驪馬  
虎脊沫流赭  
千里不生塵  
問之本無價  
騎出閭闔門  
突過不肯下  
黃金絡馬首  
珊瑚綴馬鞭  
束髮事戎行  
出身常在邊  
曾從霍將軍  
單騎殺左賢  
功高衆所忌  
漢主吝官爵  
白首不封侯  
牙齒今欲落  
平生一狐裘  
蒙茸不堪著

鬪雞篇

飛樓表閭闔  
復道羅第宅  
千金養死士  
門下多俠客  
平明肅徒御  
鬪雞出廣陌  
朱冠豔姱姿  
金距侈繁飾  
眈眈張悍目  
揚翹奮輕翼  
趨捷惟萬端  
羽毛爛五色  
雄鳴厲霄漢  
碎錦紛絡繹  
游觀娛心意  
百萬輕一擲  
日旰各分散  
馳騁靡所迫



從軍行

六師何桓桓大將新築壇專征非黷武談笑滅  
呼韓麾下悉超距軍容誠可觀虎皮蒙金甲鶴  
轡錯雕鞍鳴鏑中毅率揮矛捷如湍免胄式趨  
風蓐食會傳餐原野相蹂躪縱橫塗腦肝朔風  
揚鏡鼓壯士慘不歡平生投筆懷慷慨獨長歎  
遭逢全盛日誓欲斬樓蘭勒功燕然側圖形雲  
臺端

關山月

新月似弓彎征夫苦未還胡奴吹感粟彷彿度

關山中宵聞此曲不覺淚潛潛那能隨朔鴈飛  
過玉門關

塞下曲

雜虜寇飛狐偏師出靈武紛紛飛符下點兵克  
部伍輕行盡卷甲設伏齊鼓弩馬頭哀笳發聽  
者淚如雨

出關

烽火照居庸分兵出漢宮前軍度黑水後騎發  
雲中長驅沙漠靜轉戰虜庭空陰山一夜雪愁  
殺遠從戎



入關

射鵬馳碣石飲馬就黃河單于未繫頸天驕已  
請和連營橫吹動齊唱凱旋歌邊月明金甲胡  
霜耀寶戈封尸築京觀功比貳師多

隴頭水

與君別隴頭隴水東西流逝川無還時君去不  
復留隴水流不歇君情莫斷絕欲免長思慕何  
如勿離別請觀機中素裁剪寧復完念君遠行  
役會面誠獨難

戰狼山

戰狼山師失利孤軍赴闔蹈危地丹旌耀金鼓  
沸鬯弧投袂敵王愾揮長矛截雲際揚靈仗順  
殲醜類虜騎集戎馬銳衆寡不敵士短氣防豕  
突縱虎噬空拳冒刃奄自斃師被圍援不至星  
奔電駭無闔志大風揚砂折樹木咫尺不辨人  
鬼哭僵屍彌野血蔽川烏鳶飛飛食其肉

苦寒行

嗟哉遠征人苦寒難具陳黃塵沒馬足霖潦膠  
車輪朝出居庸關暮走并州路滹沱孟冬月冰  
堅不可渡塞外多悲風密雪何濛濛浮雲慘無



色飛沙蔽長空陰山不見虜斥堠勞且苦昨夜  
軍書至士馬多物故百里逐水草千里裹餽糧  
嚴冬冒霧露召募赴朔方狐貉難以居挾纊猶  
絺綌室處尚寡歡何況征戍卒嘗聞昔人言五  
方風氣殊眷眷懷故鄉故鄉信可娛

江南樂四首

人言江北好不及江南樂山水信清嘉風俗亦  
不薄

少小住閭門正近繁華市日暮紅塵合馬蹄如  
流水

畫鷁戲清波並出橫塘口將船繫樹根買魚即  
沽酒

別家何草草還家苦不早呼兒細問之亦說江  
南好

採桑曲

交交倉庚鳴蠶月伐遠揚江介多游女微行執  
懿筐信美土風厚儉嗇感陶唐采采桑中堪采  
之爲餽糧沃野有遺秉相率務農桑嫔茶而薪  
樗築圃以滌塲魚羔及時樂願言萬壽康

折楊柳二首



下馬折垂楊  
征人各斷腸  
柔條不堪折  
遠別使人傷

折柳贈征人  
征人畏遠行  
何人吹玉笛  
吹出別離情

自君之出矣二首

自君之出矣  
不復爲膏沐  
思君如車輪  
步步相馳逐

自君之出矣  
明鏡不復開  
思君如梁燕  
朝去暮復來

夜夜曲二首

獨處夜如年  
夜夜不成眠  
惟有多情月  
來照妾

牀前

蘭燈明欲滅  
複帳暗棲塵  
空持合歡被  
不見一心人

長干曲

停橈暗相語  
妾在長干住  
郎亦秣陵人  
便可同舟去



袁永之集卷之三

袁永之集卷之四

五言古體

南狩篇

繁臺宴集

五日桃花園宴

祝京兆宅諸文士宴集

陪大中丞顧公玩月上方山

脩禊石湖作

劉推官孟材過飲山樓

夏日諸子山堂宴集



九日泛舟石湖遂登郊臺作

宿寶華寺

堯峰觀朝雨

卒業治平寺示同志

石湖草堂成即事書懷

始發澣墅別親故四首

梁溪獻諸兄

釋褐日與屠文升言懷

立秋日懷諸兄

久繫

近戊

僦居慈感寺

移居峴山精舍

登飛英寺塔

山居

初晴步至蘇灣山

苦雨

春日樓居

夏日山齋作

行園



列岫樓成示諸友

王履吉卧病越溪莊携酒相看

林僉憲世觀追餞還珠洞賦五平詩言別

陽朔試諸生賦五仄五平詩

五仄詩寄王參政應時

別朱秋官瑞卿

送許廷議二首

送戚秀夫宰歸安

送沈元材宰桐廬

送謝鳳儀赴蜀

送人奉勅賜慶成王金幣

送鄭司訓之瑞安

送馬伯交之南康

送叔兄補之卒業南雍四首

送徐民則游太學

贈陳真人

贈許徵君彥明

芳樹篇贈董子元

釋毀篇投高吏部子業

答沈山人玉父



題盧師陳所居五塢山房

四悼四首

十懷十首

悼女林詩

袁永之集卷之四

南狩篇七十韻

正德庚辰年作

南畿肇寓縣北極真京轂宅洛寧宗周王秦阻  
嶠谷 文皇昔龍飛幽薊朝群牧定鼎峻華戎  
展親分寶玉遼海截疆圉關防包甸隩淵機協  
神明洪業恢圖卜八葉超三五陽九屯百六宗  
強錯犬牙枝弱忘牛牯豫章扼江淮吳楚介庸  
濮閩越承上游嶺嶠衍平陸烝徒謀繹騷魚鹽  
業饒沃封豕構不道虎視騁所欲 王室間多  
難徐方念無祿佳兵干齊斧恃險窺寶籙張皇



飛鏑鳴蹂躪遺黎哭市朝蕩丘墟邑里空杼軸  
陽精蝕氛祲洪波沸川瀆穢德厭腥聞淫威慘  
荼毒逋逃列爪牙饕餮寄心腹劉李忍從逆孫  
許甘就戮長吏膏草野朋讎爲魚肉歡昵光五  
宗睚眦夷三族鴟張亂天常席卷昧神速電駭  
餘艤發雲蔽旌旗縟烽燧耀藪澤鉦鼓喧林麓  
誓戒狗刑牲矯誣沉璧穀九江殘破餘安慶攻  
圍促孤危絕倚角倉卒寡儲蓄風塵河朔昏唇  
齒荆揚賊維時楊侯烈嬰城抗伸縮百道防夾  
攻一面當飛鏃墉懸偏陽布塹列君山木折骸

病靡告沈竈志猶勗即墨輸秘謨睢陽步高躅  
膚功等丘嶽鴻譽流簡牘中丞何番番文武今  
方叔折衝夕投袂超乘晨離局虎臣翕以奮大  
義相感觸雄戟敦胄士輕騎馳戎僕千慮採輿  
誦六竒資神獨批亢虛易擣攻瑕堅乃伏賈勇  
爭先鳴失據思內屬濯征匪逾時薄伐惟信宿  
葦若旣摧折巢穴先傾覆土崩悉奔潰狼顧相  
馳逐轉鬪恣隳突拔圍趨挫衄我師未成列大  
憇奮前搢劉淠丹徒耻楚靈乾谿辱嗟哉茲土  
民虺蜴罹凶酷僵屍彭蠡濱漂血匡廬澳髑髏



烏鳶奕京觀鯨鯢築夷滅同振槁豪華如轉燭  
銅駝靖幾哲黃犬斯悲蹙離宮蔓杞棘高臺游  
麋鹿燕榭秋泥落花沼寒蕪綠禍盈異哀榮理  
至循剝復乾坤荷寧謚江漢瞻清肅捷書騰露  
布鏡歌雜哀筑九廟馘未獻獨夫罪咸暴 天  
王赫斯怒歲宴御戎服徂東慕車攻在邑誇塗  
續駟介飛重英虎賁夾五祭仗鉞表親征銜璧  
徯刑劓金聲播遐壤稜威振殊俗戾止陳鞞鞞  
佚游謠黃竹宴鎬諒樂豈橫汾嗟不屬愴彼祈  
招詩悵悵亂心由於鑠貴時晦倒載斯戩穀車

書混文軌蘭鉞橐矢箠所期各宗盟展也永親  
睦

繁臺宴集示諸君

飛蓋集梁園華榭啓文燕多士何逶迤我我秩  
星弁禮容咸可觀獻酬互交薦大烹享王賓饗  
人進珍膳歌技紛前陳萬舞肅金縣茲晨季秋  
節時物忽以變芳菊揚其華崇林散郊甸歡樂  
無常存令名豈徒羨執觶思有終言示諸材彥

五日桃花園宴

靈雨晨復夕新水滿陂池輕鳧駭織鱗朱榴耀



錦葵嬉遊悅令節嘉賓咸在斯暢然神飈至暑  
氣清華懷芙渠臨綺䟽菖蒲泛羽卮圍棋間六  
博旣醉無愆儀遂獻蓼蕭什還稱頌弁詩嘗聞  
西園讌佚樂寧異茲

祝京兆宅諸文士宴集

山澤蘊靈異荆吳多秀民絃歌沐皇澤禮讓藹  
儒紳宗工秉文律述作善彌綸摠藻宣金石司  
契窮天人君子敬下士列坐集嘉賓軒車儼登  
降脾臑圓方陳絲竹娛心意歡謔各相親篇翰  
後傳玩疑義共討論食苹思欸曲伐木懷苦辛

小儒事章句逢掖趨後塵周行勞惠示下體荷  
采甄幸逢休明運文命敷海濱四靈應時集九  
軌畢來臻彙征啓亨衢濟濟咸席珍

陪大中丞金陵顧公玩月上方山

詰旦趨廣渡昏莫陟崇岡川原氣候改林麓鬱  
蒼蒼陰霞冠陽阿密徑阻脩梁樵采歸以絕游  
豫樂未央旣在嘉遯儔遂謠叢桂章霜楓麗丹  
牖秋色紛難詳飛月出層霄泫露沾衣裳列筵  
面澄湖肆眺臨遐荒不醉諒無歸遡風騰羽觴  
令德暢徽音示我以周行悅賢喻飢渴覲止承



寵光各勉日新志豈弟神所康

脩禊石湖作有引

嘉靖丁酉三月三日上巳也其日又  
爲穀雨旣欣令節乃集良朋爰脩禊  
于石湖羨羲之之山陰希黠也之沂  
水不有詠賦何以述志陶情乎乃作  
此詩以倡同游之士

大化陶天地令節屆春陽澄湖包廣臯翠嶺連  
崇岡嘉儵躍以嬉冥禽翮高翔微雲藹遠霄冷  
風唵脩篁雖無絲與竹散懷藉壺觴神怡理自

足心暢憂可忘旣詠舞雩什載奏山陰章悠然  
傲千古焉用遊羲唐

劉推官孟材過飲山樓

日掩山中扉忽枉府中駕登樓望澄湖列宴臨  
虛榭芳園榮槿葵遠洲環桑柘新篁冷風來清  
陰滌煩夏誦君瑤華篇逸思騁陶謝蘭卮且獻  
酬焉知卜其夜

夏日諸子山堂燕集

辭榮謝朱紱守寂棲青門蕭然環堵室何異柴  
桑村跡已朝市絕道惟丘壑存忽枉二三子花



下塲清尊靈雨散炎燠涼颼扇微温紫蘭秀文  
砌素馨香雕軒冰盤薦瓜藕珍饌羅雞豚醇醪  
旨且嘉獻酢禮無煩蹇余實糞土愧爾皆璵璠  
既醉思有終屬厭復何言稱詩各陳志古誼期  
相敦

九日同吳元定朱日宣王履均履圻泛

舟石湖遂登郊臺作

睽茲季秋月言遊重九辰商飈息遠臯霽旭麗  
芳津山川信可娛况也諧嘉賓澄湖翔鷁首絲  
吹紛前陳載登吳郊基曠望開心神玄鶴唳中

天逸響落九垓仙菊浮清醴茱萸調紫尊且願  
今日樂焉能知古人馬臺旣蕪陲牛山徒悲辛  
但願坐上客遨戲永干春

宿寶華寺

杪秋慘僚慄涉晨事遊豫川原殊氣候臨泛亦  
寡趣環渚澹澄潦平陸多荒霧水禽紛飛鳴葭  
葦蔓零露衝風揚夕波進帆趨廣渡雲霞異綵  
翠山麓眇昏暮旃林鬱岩堯始與賞心遇丹楓  
冠陽阿興矚咸可賦月出照孤澗蒼蒼隱寒樹  
法侶欣招邀禪寂夙有慕清曠屏氛雜沉冥觀



良悟萬事徒龍蠖短謡輸情素

堯峰觀朝雨

山中多幽事幽事殊可悅飛雨黯以暮朝光互  
明滅崇林嵐氣昏密徑樵采絕紛吾慕嘉遯茲  
山亦寂茂澗水當階鳴岡巒依戶列寡欲謝所  
牽冀與智者說

卒業治平寺示同志

干祿游黌校卒業投山林山林從吾好文史可  
娛心我友粲華實輸衷逾斷金淨域寡營慮墳  
典共披尋嚶嚶和鳴烏楊園流好音叢竹無俗

氛嘉樹多清陰陶情託毫素遣興惟幽琴寂滅  
理無味清虛念斯沉大道究玄覽物滓澄冲襟  
言示諸同好懇悃觀茲吟

石湖草堂成即事書懷

弱質弛耕牧幽棕眷丘壑章句非吾好狗物豈  
云樂工拙貴適已焉能縻好爵滅跡投蓬蒿養  
痾對山郭傾寫諧良知篇翰時間作茲山蘊靈  
異新構果宿諾幽妙難具述烟霞殊丹腹經始  
寡人力垣墉謝築削疊石即故基傍巖無改鑿  
粉梓羅軒楹藤花布帷幕啓扉列岡巒抗館來



烏雀暮春美遊遨即事多歡謔園桃舒紅英林  
篁苞紫籜物序觀丰容深衷遂棲託隨時順偃  
息遺情永寂寞將貽匏瓜誚撫躬媿虛薄

始發潯墅別親故四首

明發辭密親僕夫戒前驅銜恤去桑梓訖訖赴  
脩塗通波涉廣津舟楫具烝徒鄰里相集送屏  
營岐路隅問余曷遐征偕計游天都玄冬多雨  
雪苦寒烈肌膚百草淒以萎孤獸慘號呼王事  
諒孔嚴饑渴亦勤劬古人好從事投會輕棄繻  
焉得顧私暉坎壈局陋軀

改歲靡室處出宿歷故疆居人念道路游子行  
裹糧迫杼馳迅湍飛旌指脩梁懷土非明哲情  
感自悲傷伊予吳越民念茲投朔方節候異涼  
燠風氣限柔剛踰淮橘爲枳首丘焉可忘小人  
重遷徙棲棲戀本鄉君子崇志業懷寶豈迷邦  
無聞聖所耻黽勉脩名揚

父世生諸子憐余最孱幼束髮業詩書章句親  
口授七齡學詠歌揖讓窺俎豆十四游膠庠章  
縫廁群胄十五試明經懷玉屢不售茲晨遠行  
邁狗祿事奔走上堂強爲歡慰勉含悲酸幸有



諸兄弟旦夕善自寬茲行非永久無爲坐長嘆  
問余何時歸不得羈微官汝實多疾疚道途可  
加食藥物曾携否衣裘恐未完季冬十二月北  
土恒早寒汝有諸圖史逆旅且無觀僕御宜相  
假相依以爲安汝實識事淺世路多險難言若  
不出口慎無爲禍端念哉崇令名辭盡意不殫  
長跪聞此語涕下何沆瀾飲恨出門去惻惻復  
盤桓

少小寡交合託契悉英髦疇昔同蹤跡隨時偃  
蓬蒿吹噓憐煦沫述作爛抽毫華館集歡燕良

夜美遊遨言笑傾廣坐燈燭粲蘭膏優容荷君  
子虛薄媿吾曹昔賢喻製錦不學強操刀嘉薦  
濫忝竊此離誠鬱陶飲餞陳廣陌瞻望陟林臯  
燕婉同胞友言別使心忉仰視雲中鴈哀鳴亦  
磬磬物情慕儔匹誰能不悲號會散各有期乖  
隔安可逃殷懃冀來什好我念劬勞

梁溪獻諸兄

旦發閶闔郊宵濟延陵津岡阜鬱彌望原野亦  
相因是時季冬月密雪蔽城闔冰潦膏中塗舟  
楫阻河濱桑梓念睽隔風波畏苦辛生平多憂



患眷戀惟交親伯也章縫彥仲氏草莽臣孔懷  
棠棣奏說懌頰弁陳提携荷夙昔乖別愴茲晨  
努力奉明德願言各自珍

釋褐日與屠文升言懷

多士啓彙征辟雍賦觀旂揖讓陳俎豆莫等無  
愆儀君子崇豈弟式宴沐恩私節奏肅金懸雅  
頌揚魚麗旨酒可娛賓嘉肴亦維時場苗在維  
繫醉飽在蕭斯章服眷新寵綈袍感故知少小  
慕術藝夙昔荷提携綢繆斷金好諷詠谷風詩  
絃匏本同調出處慎無違王陽結綬日貢禹彈

冠期泰階際昌明皇軌當清夷黼座拱堯舜密  
席列臯夔璿璣順其序玄綃澹無爲天網羅群  
髦冠鞶何逶迤寵光旣優渥撫已益慙悲徽烈  
期丹青懋功勒鍾彝夙夜奉明訓往哲有遺規

立秋日懷諸兄

傾曦迫時寢流火知歲徂茲宵判涼溫淒氣慘  
以殊玄蟬號條枚白露膏中途北土恒早寒絺  
綌難曳婁朔風揚胡沙蕙草日摧枯嗟予遠行  
役旅食寄邊隅鞶帶非所榮束縛寡歡娛弱質  
纏疾疢福性畏馳驅流俗多忤愆禮法苦見拘



檮櫟非梓材丹雘焉所塗脩名耻不立撫躬昧  
前圖道遠自詒阻何由悉區區

久繫

首夏就詔獄今茲涉商秋師聽窮五辭峻罰罹  
百憂明明 天子法防衛何其周晨飡荷校苦  
夕寢園扉幽體膚嗟毀傷重以冠裳羞殷湯拘  
夏臺姬文姜里囚治長亦何罪縲縛自有由余  
實曠官守負釁若山丘賤臣徒叩心焉得達  
宸旒所冀沐寬假已矣誰怨尤

近戍

問余戍何方薄竄投粵地於粵信樂土吳俗頗  
相類耕桑可寧居方言亦無異茲惟 聖主恩  
獲遂鄙人志服官彌六朞干祿豈吾意迂材寡  
世用果爲時所棄省愆復何云伏禍寧知避三  
復犧牛言但媿蒙莊智

僦居慈感寺

孤居城南寺軒館殊清幽連峰窓中列澄湖檻  
外流群魚戲藻岸衆鳥鳴桑洲膏雨原野綠東  
作集前疇閉戶寡人事玄典日冥搜蕭散娛心  
意焉用懷苦憂



移居峴山精舍

山寺閔精廬移居性所適寧知賓客稀漸與城  
市隔岡巒何秀美蒼翠還日夕夏木密以陰幽  
鳥來几席開窓見漁舟湖水清且碧焚香日晏  
坐遣興在篇籍余本迂散人禪林亦靜僻茲焉  
遂吾好已矣思屏跡

登飛英寺塔

浮圖凌泰清豁達涼風生山川鬱相向井邑互  
縱橫茗水天日來隱隱抱孤城旅人何棲棲歲  
月忽徂傾昔來尚雨雪今茲已朱明日與二三

子游宴寡所營

山居

野人性好靜愛此山中居閉門日高卧午窓頭  
未梳釋子親樹藝飯我以園蔬春月農事興百  
室勤荷耨觀賞頗娛心閒讀老氏書茲方亦樂  
土何爲歎歸歟

初晴步至蘇灣山

開春苦常陰茲旦喜新霽谷風扇輕溫雲天屏  
氛翳薄遊遵陽阿散步綠水澁園桃紅半舒隄  
柳綠初曳高丘鬱嶢嶢故陟慨蕪廢昔人既淪



亡今人復流滯

苦雨

淫潦何沉沉浮雲晦昏旦高衢盈塗泥廣澤增  
波瀾炎州苦下濕憂來但悲歎有敦瓜蒸薪飛  
飛埽鳴鶴自余客茲方歲月忽迴換遷移無寧  
居喧囂性所憚疾疢時相煎焉能事篇翰願因  
凱風至吹彼陰霾散

春日樓居

四野春氣改微和揚緒風新禽鳴前簷庭草綠  
丰茸念茲陰陽移歲序已不同憂來傷人心七

情內相攻金石尚銷鑠何況於微躬且但徇所  
好無爲鬱忡忡

夏日山齋作

首夏稍清和山齋且高卧榆陰綠滿窓黃鳥鳴  
相和沉瘵雖未興短篇聊自課無煩掩荆扉窮  
巷何人過

行園

野墅日多暇山園時一窺新篁漸抽徑高荷初  
挺池蓄薇紅霧委玫瑰香風披夏菘束堪把春  
韭剪離離未指抱甕勤聊爲餬口資頗嫌石尉



侈言賞潘生嬉肆目無留翫棲心諧所期逍遙  
匪外獎勞歌知者誰

列岫樓成示諸友

樓居何巍巍巍巍薄太清璇題浮二曜藻幹垂  
列星我吳實隩區山川孕精靈具區象河漢天  
目擬嵩衡伊余無所好夙好幽人貞卜居獲嘉  
壤山川互迴縈創規準陰陽面勢以經營前睇  
南嶽遙後瞻北麓尊風窓氣迴薄雲戶思杳冥  
因之遠眺望遂以居高明既齊榮辱理復違朝  
市情簞瓢自足樂千駟庶可輕作詩貽同志悠

悠知我心

王履吉卧病越溪莊携酒相看

南湖新水綠仲月天桃落輕舟焉所如有客卧  
山郭憂虞曠故歡言笑諧今諾憐君體虛羸况  
苦煩痾作茲晨喜無恙共此花下酌園桑已抽  
條徑竹初含籜溪清數游鱗場廣觀舞鶴舒散  
鬱抱開佳賓勝良藥蠶稼勿苦辛文史可娛樂  
願保金石軀時來慰寂寞

正月五日子將往陽朔林僉憲世觀追

餞還珠洞賦五平詩言別



青陽熙初春和飈披炎陬東征遑寧居星言浮  
蘭舟朋僚悲分睽壺漿欣追遊攀蘿升危巖觀  
魚臨清流山收澄霄雲帆停滄江鷗新禽鳴嚶  
嚶同聲知相求玄談騰芬芳深情諧綢繆良因  
金蘭嬉非綠壘觥留行行辭嘉賓依依生離憂  
陽朔試諸生賦五仄五平詩

振鐸試粵壤升堂趨文儒角藝自古昔揚言繇  
唐虞赫赫列聖典循循先師謨孰謂此遠僻  
皇風同疆隅朔邑壯以麗山川雄京都豈乏雋  
異士思齊游商徒絕谷產豫梓幽渠生蠙珠細

物固若此何云吾人殊衰也甕牖子樗材慙踈  
迂一貫昧孔訓多岐悲楊朱永嘆道喪久誰當  
開迷途所貴造士者同心希蘇湖

春日思歸賦五仄詩寄王參政應時

歲律早已變少壯豈再得日月邁隙駟忽忽意  
愴惻試上桂嶺望綠野動秀色故國渺萬里矯  
首不可即改火靡尺素朔鴈絕羽翼白髮苦短  
短攬鏡幾太息別業在茂苑夢寐頗想憶五斗  
耻紱冕一命忝翰墨伏誦石尉引更咏晉令什  
魯叟嘆肆志蹈海信可則豈慕富與貴所願稼



且稽祗感國士遇未忍遽謝劾哲友秉俶儻夙  
夜務令德念我涸轍鮒煦沫假惠澤狗祿強就  
列量已欲解職逝矣舍此去出處各努力

別朱秋官瑞卿

相送城南隅離懷方未已桂檝繫垂楊冰盤薦  
沉李湖陰飛雨來山黑濃雲起茗水自東流眷  
然念桑梓

送許廷議二首

驅馬出國門僕夫肅嚴裝苦辛難具述千里行  
裹糧漠野何蕭條落日見牛羊客游慘不樂靡

靡思故鄉簡書我所畏誰能不感傷君其崇令  
名努力在方剛

問子逝何之告我將出宿昨者銓衡召佐郡於  
鉅鹿皇居切天樞冠蓋相馳逐紛紛青雲士爾  
獨違京轂抗義寧顧私居卑敢辭辱凡百敬爾  
儀豈弟神所福

送戚秀夫宰歸安

宓生蒞單父言公宰武城簡易象玄化絃歌流  
頌聲信美越陬牧山川含淑清茗谿散花竹風  
俗事蠶耕筐筥率婦子錢鎛無游氓我友秉淵



尚端笏豫休明分符試茲壤祗役念遐征方懷  
簡書畏誰軫別離情

送沈元材宰相廬

夙齡慕丘壑信美聞桐廬茲邦信可悅土風清  
以舒端委想至德朴野類秦餘婦子勤紡績  
庶業樵漁定山表靈異珍木秀而踈漁浦清且  
淺濠梁觀游魚山谷多逸民棄世慕長沮名賢  
抗高烈嚴氏播璠璣緬茲富春側清風猶穆如  
蔓草淪荒臺白雲明廢墟懷賢諒有述遊豫樂  
只且坐嘯恢教理卧治敦化初不擾絕諍訟無

爲宿垢祛槐榆蔭郊邑烏雀下庭除藹藹絃誦  
聲章甫歌下車惠物維豈弟約已在謙虛盛德  
若不足安常故無譽請誦靖共什神聽其舍諸

送謝鳳儀赴蜀

遄征迫徂冬飛旆指長路川梁阻峨水岡巒隱  
寒霧北極控關隘皇蹕儼攸駐軒裳歛翔集介  
圭共趨赴多士依光華朱轂各有慕燕婉同心  
友佐牧理民務一麾非早秩全蜀式王度及茲  
方剛日徽猷勉崇樹

送人奉

勅賜慶成王金幣



宗子肅明訓孝友篤倫綱邁德抗先烈令譽式  
宣揚司府亟以聞 皇心豫且康重書勤歎獎  
寶鏃兼玄黃行人實有辭承命以趨蹌陳思敬  
禮士枚馬歡游梁小子颺頌聲敢曰告多方王  
其秉侯度夙夜遵典常

送鄭司訓之瑞安

晨出東都門送子涉長道車塗畏霜霰舟楫苦  
冰潦徂征殊寡歡執手且相告甌粵在南服仲  
春宜可到敬敷弘典常多士乃有造投我葑菲  
辭冀子瓊瑶報

送馬伯交之南康

佐牧南康州州在匡廬下香爐天際列瀑布雲  
中瀉登臨信可娛簿領知多暇懷賢諒有徵斯  
文豈淪謝

送叔兄補之卒業南雍四首

我送叔氏去曰至帝城隅檀車赴脩軌不得少  
躊躕游鷲翔高冥迅翻歷九區君子抗遐烈焉  
能爲陋儒名實苟相眩好惡人人殊傷哉荆山  
璞委之於路衢

女蘿附松栢枝蔓相糾纏如何骨與肉中道自



棄捐伊余少也賤樂有叔氏賢友于篤人綱興  
文粲成篇循循孔墨訓夙夜共鑽研何圖人事  
乖綿邈阻山川四載始歡聚茲晨復言旋鬱陶  
傷我心氣結何能言農夫豈憂歲所患無良田  
令德崇日新勉之少壯年

來思歲云暮雨雪玄冬陰遄歸季春月朱火赫  
將臨亢旱稍以蘇膏雨灑芳林槐榆蔭阡陌麥  
隴雝文禽感此時物變焉得不傷心黃塵蔽緇  
衣何事久滯淫好爵未可縻歲月徒侵尋寄謝  
父與母離思誠難任

煌煌帝京邑制度殊五方觀闕與天侔樞極  
奠中央玄雲翼璇臺綺構相輝煌多士影華組  
珮玉以趨蹕小人奉薄伎發跡文藝場恭承  
王明惠朝右廁班行弱質懼罪讐致用異圓方  
勢利難久居榮名焉可常腐鼠亦奚爲陳義媿  
屠羊惜無晨風翼隨子返舊疆

送徐民則游太學

北極奠京轂南離開辟雍日月懸人文三五登  
皇風群髦若淵海禮讓何從容碩儒秉教典造  
士颺懋功君子懷令德嘉會趨雲龍觀光陸庭



下卒業成均中上堂聞絲竹當序列笙鏞道維  
周孔規藝則游夏宗尚友志日廣親賢譽斯崇  
君其敬自勗聖哲追芳蹤

贈陳真人

清都靈仙宅桂闥雲冥冥龍虎伏紫汞日月闕  
丹經疑虛駐精照抱魄辭天刑蓮花幻繡闥蒲  
萄開錦屏纂組雜星裾橫玉朝帝庭永學長生  
術金石擬遐齡

贈許徵君彥明

建業據雄勝鍾山凌泰清千年開王氣五色綵

霞明徵君抗高尚家住石頭城還丹鍊紫汞服  
食斷黃精余昔游藝場逢之於帝京貌類古列  
仙傾蓋如平生何年謝朱紱共結滄洲盟

芳樹篇贈董子元

芳樹發華滋結根崇嶽陰上天垂膏澤美蔭周  
豐林董生秉奇秀行藝余所欽神水產名駒丹  
丘翔文禽華亭實珍藪二陸耀璵琛遥遥曠年  
歲鏗爾諧徵音曰余忝夙誼綢繆逾斷金陽禹  
聞自昔嵇呂徵在今譬彼九秋榦勁節挺千尋  
女蘿相依託共有凌霄心爲山不厭高掘井寧



憚深願言敦久要無如商與參  
釋毀篇投高吏部子業

市虎成三人鑠金由衆口無根騰謗辭太絜蒙  
瑕垢周公材且聖流言肆譏醜孟軻畏臧倉武  
叔讒尼叟古來賢哲人萋菲興左右禮義苟不  
愆人言又奚咎君實懷瑾瑜堅貞但自守憤彼  
青蠅詩傷哉爲疾首

荅沈山人玉父

寢跡偃丘牧息交杜繩樞事以沉瘵屏心將墳  
素娛緬懷榮綺倫濁季疇與俱干旌徒見求何

似商山芝華華休文子曠代同風期惠余瑤華  
音照乘輝玄珠憶昔童冠齡投契諧笙竽及茲  
白首日招隱管田廬陶公誤塵網悔賦歸來辭  
折腰良足羞掛冠未爲迂偉哉魯連生却秦奮  
英竒肆志甘蹈海鴻譽飛九區鳳凰翔高冥鷗  
鷗笑藩籬由來賢達人寧顧凡庸嗤君看五湖  
長豈羨萬乘師相携遊巖谷偶耕學長沮

題盧師陳所居五塢山房

吳邦表靈隩山水蘊清嘉緬惟南橫勝玄邃誠  
難誇飛泉懸白雲疊巘棲頽霞連岡盡叢竹密



塢多桃花信美可以居僻性思移家君家南橫  
側搜討窮幽遐俯臨北麓峻曲抱南湖斜丹房  
閔芝木列墅羅桑麻既寡徵稅憂兼無城市譁  
茲樂寧外獎絃組亦何加

四悼四首

有引

夫蒙惠廢言期牙絕奏此由存歿之  
情深而知暱之感切也死者既不可  
作追惟疇昔能無悼乎於是賦四悼

李憲副獻吉

李公海嶽秀長庚兆靈異發穎由西陲空群眇

北冀擿詞追子長作賦凌賈誼虎視萬古前鴉  
冥陋衰季徐何抗英特晚達勞指示金聲叶鈞  
韶兼總集能事煌煌弘治間文章準天地抗疏  
逐城狐挺節詆閹寺八黨雖稽留二張亦歛避  
青蠅何群飛白首從吏議淮南自狂謀公也實  
奚累繁音臺昔攀嵇龍門幸無棄白馬聆雄談  
朱絃賞真趣三復相逢行綢繆伏高義哲人竟  
山頽仰止庶可企

祝京兆希哲

祝公萬夫特殊質邁古賢錦心粲星羅繡口紛



河懸讀書數行下強記日千言覃思更生博沉  
志楊雲玄虞稗漁厥流丘墳掘其源武庫森矛  
戟腹笥傾淵泉詠諧識歲星辨議駭談天上譏  
湯武疵下刺韓孟憊酒德頌劉伶草聖輕張顛  
臨池歛揮翰錯落龍蛇騫一官苦不達斯文良  
足傳伊余昔趨侍投贈北征篇慙非陸生材嘆  
賞辱茂先大雅不可作太息撫遺編

唐解元伯虎

唐公七尺軀雙瞳曄流電逸氣騰龍騃華詞縟  
雲漢連珠擬陸衡廣志準王粲握槩希古人釋

褐冠群彥貝錦忽構讒虎口竟罹患梁獄羞上  
書浙省薄爲掾灌園聊自娛好客日高宴一諾  
輕千金田季世所羨鴻情厭鷄鶻思卑斥鷃  
逍遙富春遊懷賢發篇翰著書何必多雅什庶  
可玩令名垂丹青炳矣高士傳

王太學履吉

三吳富材傑王子絕代英清揚美如玉髻鬣宣  
令名孝友篤人綱秀敏由天成交醇醉公瑾量  
雅欽黃生友文徵德乃進師蔡九業以精詞傾  
倒峽流賦擲鏘金聲抱璞傷楚和倦游同馬卿



扁舟五湖外放浪甘蓐莖卧病歲消渴耽酒日  
沉冥哀鵬一何促夢蝶奄徂傾黃鳥聲孔悲玉  
樓草已成曰余感夙誼古道嗟彫零

十懷十首 有引

夫日月邁於隙駟居處限於風牛是  
以詩有契闊之傷騷致莫悲之嘆叙  
既往之密歡冀方來之新晤於是賦

十懷

文內翰徵仲

內翰小子師卓行古人傑辭金抗幼齡解組脩

晚節丹青紛雲烟篇翰爛虹蜺瑚璉世所珍昭  
代表三絕

顧中丞華玉

中丞何卓犖江左稱賀循材通略王霸學奧窺  
天人忘年締友誼白頭諒如新及時樹奇業圖  
畫登麒麟

施憲副聘之

施公挺苕霅英譽藉九州既欽文翰工再識吏  
事優混俗間清濁奉公來謗讎落落千丈松邈  
焉真寡儔



田僉事希古

田子奮古閩辭場早騰驟拙宦久爲郎安貧樂  
圭竇情希五嶽遊志好中山耐簡易良可親儂  
薄竊所陋

鄺文選子京

子京何恂恂儒雅復溫良藻辭薄沈宋玄理宗  
老莊賞花羨風流嗜酒慕清狂時爲青白眼厭  
俗猶粃糠

高廉憲子業

高子似簡傲意氣揭青旻沉潛繼揚叟玄妙希

王丞梁園憶傾蓋綢繆洞深情二俊倘可作蘭

玉欽難兄

子述

屠脩撰文升

屠君浙之秀交余爲莫逆叙年類劉盧投誼並  
膠漆繾綣諒無嫌患難竟有力千秋太史公高  
文永垂式

江憲副于順

江兄秉特達銳穎脫錐囊少年美白皙論交鏡  
肝腸賦窺宋賈室詩登潘陸堂盤根別利器努  
力及方剛



王參政道思

道思負材逸麗敏儕子安稱雄實擅場定霸忽  
登壇以吾一日長同心結金蘭商山芝可茹焉  
用羈微官

趙會元景仁

趙郎天下士弱冠捷龍頭文高列兩京學贍窮  
九丘辨姦蘇公識食力徐孺侔斯文未墜地之  
子紹前脩

悼女林詩 有引

女林余之第四女也生于桂林故名

季林性至孝而慧度如成人五歲忽  
以疹夭賦此以志痛焉

野蔓委朝露階蘭隕秋霜蘭彫春復滋蔓委時  
更芳如何令玉樹一旦埋土岡昨暮呼慈親今  
晨卧玄堂柔姿不再覩貞魂去何方夕寢念轉  
側曦飡咽中腸空帷間無人忽若在我傍音微  
永隔滅血淚日沾裳脩短諒由天欲遣情難忘  
始知卜子夏喪明徒自傷感彼釋氏言輪迴殊  
杳茫願結來生因聚首期久長



袁永之集卷之四

袁永之集卷之五

七言古體

燕京篇效栢梁體

觀魯迷所貢獅子歌

夏雲篇

呂梁行

閭門行

夢遊泰山歌

送平虜將軍北伐歌

送大司徒秦公歸梁溪草堂歌



送文內翰還山歌

送陳少參魯南之江西

匡廬行送王太守公濟

鳳凰臺行送楊用德

送江于春之金陵

太華山歌送張邦孚宰三原

送陸子玄遊秦嶽

送沈山人玉父遊武夷

送仲兄尚之季弟紹之同鯉姪赴試留都

寄趙參政鴻達

江生行

贈中洲徐山人歌

喻將軍歌

月夜飲浮玉山醉贈長谷山人歌

贈邵仲材太守

越吟

南中作效高達夫體



表永之集卷之五

燕京篇效栢梁體

恭承明詔游皇都  
皇都巍巍壯規模  
彤宮綺構承明廬  
日月照耀紛丹朱  
王氣鬱律朝夕殊  
遼海萬里包疆隅  
長城迢遙塞外孤  
西摧吐蕃北備胡  
居庸刁斗接延榆  
黃花原頭青草枯  
諸軍齊挽繡螯弧  
控絃鳴鏑墮飛烏  
百金選士出屠沽  
六郡良家分虎符  
羽林期門盡虬須  
殿中宿衛執金吾  
天王雍容恢廟謨  
細旃廣廈論唐虞  
石渠金馬侍鴻儒  
衝牙珮玉咸碩膚  
考鍾擊



鼓百辟趨橐弓戢矢荷歡娛郡縣述職董征輸  
蠻夷通道永無虞泰階清夷啓亨衢玉衡順軌  
七政敷皇都萬年正天樞願我 皇帝壽考與  
天俱

觀魯迷所貢獅子歌 有序

皇帝嗣服之五載魯迷重譯貢後猊焉時表筮  
仕京師薄觀于四夷館退作歌以風  
魯迷迢迢遠在崑崙西叩關通道貢後猊絕漠  
知重幾萬譯跋涉流沙經月氏初從羈縻就屬  
國傾城聚觀途路塞孿題械脰苦維繫豹鞞爲

鞞鐵銜勒尾如流星氣憑陵隅目燭地思奔騰  
四蹄蹴躡毛髮竦瘦脊碑兀排鋒稜崩雷掣電  
望風吼青兕辟易玄羆走嗇夫股栗不敢前壯  
士變色將無狃奚奴綠髯深眼睛戟手魘髻垂  
胡纓須臾鞚引藁街下俛首帖耳猶長鳴割羊  
屠狗恣所欲豐芻肥蔽日不足英雄束縛亦如  
此養恩深敢辭辱始知丹青貌不同彷彿山  
海圖經中上林已開射熊館 天子賜見長楊  
宮虎賁如雲兵衛列彊弩短刀防噬嚙詔謂圉  
人破檻車玉階舞蹈龍顏悅我聞異物不可馴



袒裼擾之如有神水衡寶鏹勅頒賜不惜金錢  
懷遠人嗚呼明王慎德卑遠略珍禽竒獸須教  
却周征白狼荒服叛漢閉玉門歌頌作先朝故  
事傳 敬皇魯迷欵塞曾來王當時謝却仰明  
聖萬古史冊生輝光今 皇端拱勤內治夷德  
無厭惟嗜利何當破械縱山林厚賞金繒絕來  
使

夏雲篇 館試

禁城佳氣接丹丘層巒疊巘夏雲稠初從火井  
溫泉起復向蒼梧赤水流炎帝龍旂來蜿蜿祝

融鸞駟鳴啾啾九疑突兀開三輔五嶽續紛列  
十洲乍看仙掌蓮花動復見天都太乙浮聚散  
長依鳩鵲觀卷舒時繞鳳凰樓漢家宮闕排雲  
上飛軒曲榭紛相嚮桂嶺遙連北斗高瑯臺互  
對西山爽翡翠翩翩戲錦波芙蓉處處迷蘭漿  
禁殿披香望翠華行宮避暑迎仙仗冰檻風簾  
六月秋炎蒸不到鳳池頭誰憐塞外征人苦揮  
汗褰帷戰未休

呂梁行

吾聞呂梁懸水三十仞盤渦流沫舟難進萬石



嶮巖利如戟諸山决裂湍尤峻徂徠五月泉水  
惡倒地崩雷赴空壑錦浪桃花夾岸高銀河瀑  
布當空落鳴鑼打鼓齊發船百夫挽之不得前  
連艦巨筏幾摧折鼉吼鯨吞爭沸淵誰言一葦  
輕可渡強弩射潮潮益怒天吳恃險河伯驕帝  
閹重重那可訴憶昔神禹疏九河龍門砥柱功  
最多地平天成九疇叙然後懷襄底定無洪波  
自從漢塞宣房始河决滎陽凡幾徙遥憐遷客  
賦黃樓猶有行人歌瓠子 文皇卜鼎都北平  
轉漕直達幽州城踰淮歷濟趨輻輳軍輸國計

勞經營當時呂梁多險阨萬國螻螻畏徭役疏  
渠鑿石殺水怒遺事猶說平江伯只今水利多  
是非 天子旰食仍宵衣司農漕粟阻不進使  
者樓船捷若飛江淮連年苦彫瘁運餉誰當念  
勞勩吁嗟安危有公等白面書生安敢議

閩門行

閩門巍巍連紫極疊雉崇墉控疆域飛梁作鎮  
限關津廣市開場通貨殖土風清嘉想端委里  
閨驕奢誇鼎食城中綺構排雲起城外青槐當  
路植梁鴻橋下柳千條泰伯祠前花萬色紅塵



日晚驅雕輦碧草春來迷玉勒魚鱗彤彤開宅  
第夾道雲甍對迢迢鴛鴦織就綴文茵翡翠裁  
來妝寶髻橫塘二月春氣濃中流畫鷁看搖曳  
陌上行行霧縠紛花間往往牙檣繫公子前溪  
唱豔詞佳人子夜翻新製朝朝簫鼓出城闌夜  
夜蘭燈迎水裔憶昔夫差全盛時離宮望幸駐  
行麾錦帆涇遠菱歌緩銷夏灣深彩仗移走狗  
鬪雞心未厭穿池鑿石游難徧初從雲嶠起郊  
臺更向花洲開別殿麝廊香徑何容與冰簾水  
檻疑無暑晝觀劍客舞青萍夜引西施歌白苧

爭長黃池干夏盟檇李曾棲勁越兵舟師電發  
餘艘出壁壘星攢組練明白謂千秋長若斯豈  
意一朝人事改愁見荒臺麋鹿游可憐故國山  
河在吳王昔日起閭門法象天居擬至尊豪華  
轉燭何終極世事悠悠寧足論

大中丞胡公巡撫山東走使邀余遊泰

山以病不赴作夢遊泰山歌以謝

我聞泰岱五嶽之所宗巍乎高哉拔起摩蒼穹  
天門日月相避隱勢壓九服何其雄扶桑碣石  
眇在下安論鳧繹連龜蒙宵夢憑陵騎六龍足



躡列缺驅冷風捫參歷井上日觀飄飄直謁元  
君宮白榆赤桂夾御道中有顏如桃花膚瑩玉  
雪綠髮皓齒十五雙金童手持靈訣授我讀科  
斗竒字殊難通凡胎俗骨不可換覺來相失滄  
溟東朝逢海上青鳥使邀我遠遊登岱宗開緘  
長跪讀數過星文雲篆恍與夢寐同尚平婚嫁  
未畢累長卿卧病還書空何當白日生羽翼飛  
上泰岱絕頂第一之高峯

送平虜將軍北伐歌

胡人牧馬窺長城五原烽火通燕京檄書忽報

雲中急羽騎遙徵上谷兵榆關二月猶飛雪朔  
風蕭蕭寶刀折士憤天驕未請和人言頡利甘  
擒滅我 皇按劍徵虎賁元戎專征出薊門明  
光殿前授斧鉞介冑不拜何其尊百金選士盡  
虓虎六郡良家充部伍旌旗蔽日奮橫行組練  
如雲遙禦侮銜枚疾走提天戈刁斗不設斥埃  
多射鵬夜沒燕然石飲馬朝乾瀚海波悲笳亂  
奏黃雲起鞞鼓喧喧振邊鄙太白高懸細柳營  
烏號齊發天山矢褰帷斂衽駭星電魚麗左右  
窮合散攬槍迅掃王庭空三軍餘怒猶思戰桓



桓嫖姚驍且雄腰間象弭韜彤弓指揮玉匣謀  
中野赫奕金貂叅上公轅門露布馳奏捷凱歌  
歸來暮春月草暗龍沙班馬嘶花深疏勒征輶  
發禁中頗牧竒六出閩外咸遵丈人律誰言疆  
場難遥度樽俎折衝知有術宣王中興調六符  
車攻吉日弘廟謨萬邦文武憲吉甫他日凌烟  
看畫圖

送大司徒秦公歸梁溪草堂歌

司徒拂衣歸梁溪梁溪草堂雲樹迷金章紫綬  
嬾朝謁鶴氅幅巾歸杖藜丈夫出處各有時尚

書八座官不卑浮雲富貴須臾事且向商山歌  
紫芝勲烈如公古來少掛冠都門亦何早手調  
六計致太平位歷三朝號元老今 皇訪落萬  
事改先朝耆舊登卿宰鸞翔鵠立有公等廟堂  
隱隱生丰采五侯七貴多帝親氣壓梁竇誰敢  
嗔危言抗疏至尊喜詔割膏腴還小民蒼頭使  
者恣饗饗煮海爲鹽擅金穴苞苴如山不敢售  
以此中官俱不悅司徒恂恂一儒者節槩干霄  
寧少假封章上乞賜骸骨朝坐雲臺暮田野天  
恩浩蕩降璽書馳驛畫錦歸故廬裴公綠野名



逾重謝傳東山樂有餘誰言直道多遭譴秦趙  
高風誰不羨路傍行人咸嘆息昨者臺諫文章  
薦即今西北胡虜強邊戍日夜徵衣糧願公強  
爲蒼生起談笑滅胡報 天子

送文內翰徵仲還山歌

朔風吹沙地欲裂燕京十月多霜雪郭隗臺前  
落葉飛武侯祠下行人別憶昨徵書下玉京公  
車薦士達承明蒲輪遠致商山皓束帛能招魯  
兩生丈人家住梁鴻里弱冠爲儒事文史不獨  
新詩繼國風自有芳名動人耳五侯持書求識

面群公走幣要相見懸黎結綠歛增價御李爭  
誇承顧盼讀書萬卷不逢時獻策金陵悲數竒  
石湖未減東山興茂苑空吟梁父詞買臣五十  
方就辟白首楊雄猶執戟校書天祿奉奎章待  
詔金門宣制冊秋風一夜思鱸魚乞歸新捧紫  
泥書誰能忍耻事干謁嬾學相如獻子虛客星  
浮沉辭 帝座直道難容文寡和江驛梅花悵  
遠離柴桑松竹宜高卧憐余薄宦滯京華北鴈  
南歸每憶家何日拂衣三島去時來問字有侯  
芭



送陳少叅魯南之江西

金章荷聖恩辭出大明門驛路雲千里都亭酒  
一尊康郎城邊春水發滕王閣上懸新月輕帆  
直下疾於飛幾日看山遍吳越揚雄白首薦公  
車曾作詞臣侍石渠直道自甘終放棄高才誰  
肯借吹噓藩叅四品官不薄豫章猶勝長沙惡  
簿書錢穀亦何勞十載功名至方岳春來彭蠡  
鴈難聞江草江花杳暮雲南歸正及鱸魚美直  
北相思不見君

匡廬行送王太守公濟

匡廬何重重秀出香爐峰層巒蔽日月疊巘攢  
芙蓉天河倒傾瀑布裂毒霧連山晝明滅長風  
萬里吹海門彭蠡波濤滾飛雪我聞匡廬山中  
有古列仙丹房粲靈芝石室開青蓮使君澶淵  
驄馬客刺史今爲二千石去年剖竹官平陽平  
陽古稱堯帝疆土風儉嗇民務簡山水豈得如  
南康僕本草野人好遊慕子長訪道遍五嶽所  
志在四方與君有神交相逢燕市傍側聞匡廬  
勝言之安可詳何能生羽翼天路相翱翔

鳳凰臺行送楊用德



鳳凰臺在五雲中天門照耀 高皇宮鍾山岩  
堯蔽日月江水直與銀河通長淮二月水已泮  
君到春衣猶未換千條楊柳映紅樓十里荷花  
開錦岸憐君拜官廷尉平躍馬朝朝出貫城太  
平堤上鳴珂散玄武湖頭擁蓋行青袍皂帽人  
人羨三十爲郎官不賤相如未受漢主知賈生  
不得吳公薦金陵山水最清妍法曹無事只高  
眠養生或注參同契閉戶惟應草太玄看君豈  
是悠悠者名位不久居人下別後無令尺素稀  
定有新詩繼風雅

送江于春之金陵

燕山正月梨花多行人幾日發滹沱山長水遠  
不忍別執手聽我驅駒歌憶昨抱策干 天子  
王陽結綬貢公喜紛紛豪俊不如君落落交游  
能有幾君家兄弟世所無雄詞逸思機雲徒囊  
中白刃新脫穎櫪上健駒思過都中朝江摠真  
俠客獨抱竒材人莫識人言袁生真腐儒維爾  
與吾爲莫逆讀書秘省一無成卧病文園類馬  
卿踈慵頗遭世俗議貧賤不免兒曹輕人生榮  
辱難自料虛名翻被旁人笑買臣五十運始通



劉向十年官不調今君作宦向金陵河漢浮槎  
望使星莫辭案牘勞終日猶勝山林老一經

太華山歌送張邦孚宰三原

迢迢太華山縹緲霄漢間左控桃林塞右走藍  
田關仙人掌上長雲雨明星玉女空中起沃野  
茫茫白鹿原濁涇浩浩黃河水張君山西美丈  
夫朱唇白面閑且都官階七品墨作綬專制百  
里銅爲符君今別我三原去寒日蒼蒼隱黃霧  
關外胡沙不見人隴頭落葉紛無數去年浮沉  
金馬門惟君年少最相親看君棲棲不得意似

厭奔走隨風塵男兒樹立貴不朽功名肯落他  
人後楊雄不羞執戟郎汲黯豈薄淮陽守世人  
往往輕儒生材具如君那可輕此行斲試牛刀  
利萬里驂騑自有程

送陸子玄遊秦嶽

有客手珮蒼精龍告我遠遊登岱宗岱宗根蟠  
九百里絕頂上有秦時封金泥玉笥秘難見古  
文竒字誰能辨日觀遙看碣石津雲峰正對蓬  
萊殿海中鰲身應天黑三山湧出神仙宅貝闕  
參差結蜃樓珠宮掩映藏蛟室君登秦嶽觀滄



海九州四瀆皆安在堂上遺音想絲竹壁間經  
傳尋魚亥丈夫所志在蓬桑焉能局促籠中藏  
看君一劍行萬里五嶽之遊自茲始

送沈山人玉父遊武夷

武夷三十六高峰層巒削壁何重重清溪九曲  
似明鏡曲曲倒浸青芙蓉仙人控鶴去已杳沈  
生好奇快幽討禮斗壇前吹紫簫昇真洞口探  
瑤草幔亭宴罷寂無聞何日虹梁度綵雲仙籍  
倘書余姓字齋心同謁武夷君

送仲兄尚之季弟紹之同鯉姪赴試留

都

金陵帝子宅 大聖開洪基千年王氣鬱長在  
石頭爲城江作池我 明人才邁前古天網磊  
砢羅英竒榎楠豫梓構清廟大澤深山方有之  
吾家兄弟在人口八元數協高陽期仲兄詞鋒  
泮秋水季子腹笥雲烟披一雙明月出海底光  
彩照耀珊瑚枝阿咸昂昂千里足追風逐電誰  
能羈長干市上昔同醉玄武湖畔常相隨荷花  
兩岸爛紅錦楊柳樹樹啼黃鸝鳳凰臺空李白  
朽但見麋鹿游荒陂登高懷古幾悲詫酒徒詞



客今留誰當年釣鰲差快意此日荷鋤聊爾爲  
朱輪繡轂豈不好巢許夔龍各有時男兒所志  
萬人敵肯學斤鷄棲藩籬今之董賈正兄輩棄  
繻早受 明王知

寄趙叅政鴻遠 有引

趙君給事黃門十年不遷久之擢叅  
政山西超然罷歸余夙投末誼欽慕  
高輓爰寄此篇

龐萌掛冠去疏傳拂衣歸昔賢抗遐烈夫子亦  
知幾十年給事黃門裏富貴何心戀青紫鸚鵡

豈受腐鼠嚇逸驥幸脫鹽車耻風波久識宦途  
危長公陶令是吾師山芝野蕨俱堪採安用高  
車駟馬爲

江生行

余試吏刑曹江生實同官焉惠而好  
我爲作江生行江生名以達字于順

江生江生真鳳雛磊落自與常人殊題詩往往  
凌二陸作賦直欲追三都前年與君通仕籍看  
花走遍長安陌白晷爭誇美少年高材那識文  
章伯 君王好士開石渠明珠暗投空上書相



如不逢楊得意左右誰能薦子虛自從署職刑  
曹裡日晏含香吟未已頗厭公庭理簿書時從  
退食觀文史見君詞鋒如利鏘巧匠運斤無斧  
鑿黃金白璧價本定大呂玄鍾時聞作我曹狂  
簡慕古人十年結客誰相親致身強欲干名利  
開口率爾談經綸危言每與流俗忤野人苦不  
通時務李邕曾觀中秘書楊雄未獻河東賦天  
曹昨者召爲郎腰間新綰象牙章閉門細究刑  
名義對吏何辭案牘忙悠悠竊祿真無補夙夜  
驅馳入司府感君雅意頗優容置腹傾心忘爾

我袖中出示瑤華篇滿堂共駭蛟龍騫託交盡  
在青雲上然諾豈徒杯酒前論文靡靡日不倦  
况也高談多口辨源委遙追大雅還體裁近詫  
黃初變世人是古遂非今鍾期不作誰知音看  
君自負亦不淺謂我粗知郢客吟國風冲融崇  
典則弘治以來宗匠出步驟時窺作者心掃除  
實賴諸公力顧我繩樞實不才自甘樗散棄蒿  
萊追攀屈宋他年事任爾橫行萬里來

中洲歌贈徐山人

我聞十洲在海中蓬萊高切玄霄宮仙房帝館



香難測璇題銀榜遙相通清虛邈與人世絕中  
有群仙盡綠髮吸露朝朝飲玉漿食霞夜夜和  
金屑秦皇漢武昔好仙東方徐市何其賢靈藥  
空求勞入海大丹難就想昇天徐公磊落滄海  
客虬髯方瞳身七尺仗劍曾排閭闔門掛瓢直  
向扶桑側嗟余頗好道遙遊與爾相期到十洲  
塵世糝糠真可厭笑騎白鹿上丹丘

喻將軍歌

喻將軍好武兼好文生駒禿騎走似電百步一  
鏃紅心分在歌痛飲酒數斗琵琶短簫不停手

雄心俠氣何翩翩論交豈在相知久男兒負材  
多好奇匈奴未滅家何爲君不見漢之霍衛起  
奴隸高牙大纛須自致

月夜飲浮玉山醉贈長谷山人歌

山人載酒來山中邀余浮玉山頭飲青天張幕  
月爲燭蒼苔布席石爲枕風吹玻璃鏡湖碎烟  
開芙蓉畫屏翠試問空山千載來誰如狂客今  
宵醉吳興山水勝輞川山人近買苕谿田自言  
堪輿術甚妙謂得景純書秘傳野人無家思卜  
築欲向湖頭縛茅屋他日期君好結隣放浪漁



樵一生足

邵成都仲材過飲草堂醉贈短歌

君不見石崇金谷今安在謝安東山陵谷改人  
生忽若草頭露河清海變誰能待成都太守休  
嘆嗟當年同看長安花一朝掛冠武林下荷鋤  
學種青門瓜世間翻覆無不有浮雲富貴真芻  
狗何用長存身後名祇須痛飲杯中酒君家兄  
弟二陸才黑頭早賦歸去來古人往往困屠釣  
我輩落落俱蒿萊西湖春來淨如鏡南峰北峰  
翠相映六橋烟柳隱漁舟孤山草樹迷樵徑休

逋逝矣不可攀千秋放鶴何時還與君笑傲拂  
衣去流水桃花心自閒

越吟

久爲越人能越吟悵然不樂非吾土一身寄食  
羞賤貧百事傷懷歷辛苦馮驩無魚彈鋏歌翟  
公之門雀可羅世情炎涼古尚爾交態反覆今  
如何仲尼棲棲曾不耻買臣未遇困妻子人生  
窮達誰自知丈夫母爲失路悲

南中作效高達夫體

僕本橫塘一漁父釣竿三尺常爲伍白首惟堪



老布衣折腰豈願趨官府自從 天子放歸吳  
茅屋荒涼住五湖窮巷杜門辭俗客薄田餬口  
著潛夫誰知世事如翻手公車誤薦收枯朽富  
貴功名笑等閒東西南北勞奔走桂林卑濕已  
難論象郡炎蒸愁殺人身在瘴鄉生是寄路逢  
蠻賊死爲鄰由來青紫非吾意封侯拜相英雄  
事裹革都無少壯心荷鋤且徇烟霞志浮海居  
夷愧孔丘茹芝飲水更何憂明朝拂袖還山去  
鴻鵠冥冥不可求

表永之集卷之五



